



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-I/25-3-40-321-4/21**

Datum: **08.10.2021. godine**

«Agencija za vodno područje rijeke Save» Sarajevo rješavajući po zahtjevu pravnog lica „Tuzla-Kvarc” d.o.o. Tuzla za izdavanje vodne dozvole za zahvatanje i korištenje površinskih voda iz vodotoka Joševica za potrebe pogona za mokru separaciju kvarcnog pijeska izgrađenog u naselju Bukinje, općina Tuzla, na osnovu člana 139. stav 1. tačka 1. Zakona o vodama («Službene novine Federacije BiH», broj 70/06), i člana 200 stav (1) Zakona o upravnom postupku («Službene novine Federacije BiH», broj 2/98 i 49/99), **donosi**

RJEŠENJE **o vodnoj dozvoli**

1. Pravnom licu „Tuzla-Kvarc” d.o.o. Tuzla daje se vodna dozvola za zahvatanje vode iz vodotoka Joševica u količini od 120 m³/h (33,33 l/s) za potrebe rada pogona za mokru separaciju kvarcnog pijeska izgrađenog u naselju Bukinje, Grad Tuzla.
2. Vodna dozvola se daje na osnovu dostavljene dokumentacije, utvrđenog činjeničnog stanja i uz slijedeće uslove:
 - 2.1. Da korisnik predmetnih vodozahvatnih objekata iste održava u funkcionalnom stanju i koristi u skladu sa njihovom namjenom, te prema uslovima iz ove vodne dozvole.
 - 2.2. Da korisnik predmetnih objekata ugrađene mjerne uređaje za evidentiranje zahvaćenih količina vode održava u ispravnom stanju, odnosno da redovno vrši baždarenje mjerača protoka u skladu sa propisima o mjernim uređajima. U cilju evidentiranja zahvaćenih količina vode potrebno je izvršiti ugradnju mjerača protoka najkasnije do 31.12.2021. godine, obzirom da je podnosilac zahtjeva dostavio dokaz da je nabavio novi mjerač protoka.
 - 2.3. Da nizvodno od vodozahvata, bude obezbijeđen ekološki prihvatljiv proticaj tj. proticaj određen elaboratom broj: TSP-04-603/20 pod nazivom „Određivanje ekološki prihvatljivog proticaja vodotoka Joševica na profilu vodozahvata za kompaniju Tuzla Kvarc”, urađen od strane Instituta za hidrotehniku d.d. Sarajevo, decembar 2020. godine.
 - 2.4. Da se izvede u potpunosti rješenje kontinuiranog mjerenja nivoa i proticaja uzvodno i nizvodno od vodozahvata, kojim će se registrovati prirodni dotok do vodozahvata i ekološki prihvatljiv protok neposredno ispod vodozahvata, na vodomjernim profilima, te izrade odgovarajuće linije proticaja na tim profilima. Ovo mjerenje predvidjeti da se vrši kontinuirano automatskom opremom sa mogućnošću memorisanja podataka. Navedene aktivnosti provoditi u skladu sa dokumentacijom: „Program monitoringa ekološki prihvatljivog protoka vodotoka Joševica na kome se nalazi vodozahvat tehnoloških voda za kompaniju Tuzla kvarc” urađen od strane Instituta za hidrotehniku d.d. Sarajevo, april/maj 2021. godine. Ova oprema treba da se ugradi sa rokom najkasnije do 30.06.2022. godine.
 - 2.5. Da se upotreba objekta vodozahvata vrši na način opisan u Opštem aktu o održavanju, korištenju i osmatranju vodnog objekta, te da se vodoprivredni objekti održavaju, koriste i osmatraju u skladu sa tim aktom.
 - 2.6. Da se Ministarstvu poljoprivrede, šumarstva i vodoprivrede Tuzlanskog kantona podnese zahtjev za dodjelu koncesije za korištenje vode iz vodotoka Joševica kao prirodnog resursa u skladu sa Zakonom o koncesijama (Službene novine Tuzlanskog kantona broj: 5/04, 7/05, 6/11, 1/13 i 11/14), a nakon ishodovanja koncesionog ugovora njegovu kopiju dostavi ovoj Agenciji.
3. Da korisnik predmetnih objekata vrši mjerenje količina zahvaćenih voda i o tome vodi evidenciju na propisanim obrascima, da podatke o tim mjerenjima unosi u propisane mjesečne izvještaje i iste redovno dostavlja ovoj Agenciji na način, po postupku i u rokovima određenim Pravilnikom o načinu obračunavanja, postupku i rokovima za obračunavanje i plaćanje i kontrolu izmirenja obaveza po osnovu opće vodne naknade i posebnih vodnih naknada (Službene novine Federacije BiH. br. 46/07, 92/07, 46/09, 79/11 i 88/12).
4. Korisnik objekata je obavezan da redovno plaća posebne vodne naknade za korištenje voda u skladu sa važećim propisima.

5. Ukoliko radom predmetnog objekta dođe do promjene režima voda, a te promjene prouzrokuju štete ma kakvog karaktera, korisnik je dužan uzroke štete otkloniti, a nastale štete nadoknaditi.
6. Prava stečena na osnovu ove vodne dozvole ne mogu se prenositi na treća lica, a ista se mogu izmjeniti u zakonom propisanim slučajevima.
7. Ova vodna dozvola, shodno članu 117. stav (1) Zakona o vodama se daje sa rokom važenja od pet (5) godina, od dana pravosnažnosti ovog rješenja.
8. Korisnik vodne dozvole je dužan da prije isteka važnosti ove vodne dozvole podnese zahtjev za izdavanje nove vodne dozvole.
9. Ovo Rješenje o vodnoj dozvoli može se izmjeniti ukoliko nastupe okolnosti iz člana 130. stav (1) Zakona o vodama.

O b r a z l o ž e n j e

Pravno lice „Tuzla-Kvarc“ d.o.o. Tuzla, zahtjevom broj: IP-784/21 zaprimljenim 16.07.2021. godine se obratilo ovoj Agenciji za donošenje rješenja o vodnoj dozvoli za zahvatanje vode iz vodotoka Joševica za potrebe rada pogona za mokru separaciju kvarcnog pijeska izgrađenog u naselju Bukinje, općina Tuzla. U prilogu zahtjeva za izdavanje vodne dozvole dostavljena je slijedeća dokumentacija:

- Ovjerena kopija aktuelnog izvoda iz sudskog registra Općinskog suda u Tuzli;
- Ovjerena kopija Uvjerenja o registraciji/upisu u Jedinostveni registar obveznika indirektnih poreza, broj: 04/1-UPP/1-9851/07 dana 01.08.2007. godine izdato od strane Uprave za indirektno-neizravno oporezivanje Banja Luka;
- Kopija dopisa Agencije za vodno područje rijeke Save, Sarajevo broj 10-538-4/21 od 01.07.2021. godine, o okončanju postupka evaluacije dokumentacije (Elaborat o određivanju ekološki prihvatljivog proticaja i Programa monitoringa ekološki prihvatljivog proticaja vodotoka Joševica);
- Kopija rješenja o upotrebnoj dozvoli broj: 06/1-310-473/78 od 16.8.1979. godine, Republički sekretarijat za privredu Sarajevo;
- Kopija saglasnosti za obavljanje rudarske djelatnosti broj: UP1-16-18-2-06526/2018-1607-4-P od 23.01.2019. godine, Federalni rudarsko, termo i elektro-energetski inspektorat;
- Opći akt o održavanju, korištenju i osmatranju vodoprivrednog objekta;
- „Glavni projekat izvedenog stanja objekta za zahvat vode iz rijeke Joševice“ urađen od strane JP Spreča d.d. Tuzla, decembar 2009. godine;
- „Određivanje ekološki prihvatljivog proticaja vodotoka Joševica na profilu vodozahvata za kompaniju «Tuzla kvarc»“, Institut za hidrotehniku d.d. Sarajevo, decembar 2020. godine (u printanoj i elektronskoj formi);
- „Program monitoringa ekološki prihvatljivog protoka vodotoka Joševica na kome se nalazi vodozahvat tehnoloških voda za kompaniju Tuzla kvarc“ urađen od strane Instituta za hidrotehniku d.d. Sarajevo, april/maj 2021. godine (u printanoj i elektronskoj formi);
- Dokaz o uplaćenju upravnoj taksi.

Na osnovu pregleda dostavljene dokumentacije utvrđeno je slijedeće:

- Sistem koji se koristi za snabdijevanje tehnološkom vodom u pogonu za mokru separaciju kvarcnog pijeska se sastoji od: zahvatne građevine, objekta pumpne stanice sa mjeračem protoka, rezervoara i spojnih cjevovoda;
- Objekat vodozahvata pozicioniran je uz desnu obalu, odakle se preko predkomore i sabirne komore voda zahvata i transpotruje do glavnog sabirnog bazena tehnološke vode. Objekat vodozahvata se sastoji od: zahvatnog dijela - otvorena uređena građevina, pumpne stanice sa ugrađenim pumpnim agregatom (horizontalna centrifugalna pumpa, snage $N=55\text{kW}$) sa mjeračem protoka DN 150mm, te potisnog cjevovoda $2 \times 250\text{mm}$ od objekta pumpne stanice do postojećeg bazena za prihvatanje tehnološke vode (zapremine cca 1400m^3) iz kojega se voda uvodi u sistem za obradu pijeska;
- Ukupna dnevna zahvaćena količina vode iz rijeke Joševica je promjenljiva i ovisi isključivo o vremenskom korištenju instalisanih kapaciteta postrojenja za obradu pijeska. Pumpe se uključuju po potrebi (za dopunu vodom bazena za prihvatanje tehnološke vode), a rad pumpi je cca 2-3 sata dnevno. Kapacitet pumpne stanice iznosi $Q = 120 \text{ m}^3/\text{h}$ ($33,33 \text{ l/s}$);
- Podnosilac je priložio izvještaj o količini zahvaćene vode (obrazac ZV) za mjesec mart i maj 2021. godine i otpremnicu – račun o nabavci prirubničkog vodomjera DN150mm;

- Automatska vodmijerna stanica, uzvodno i nizvodno od vodozahvata nije uspoostavljena te korisnik vodne dozvole nema uvid u količine vode u vodotoku nizvodno od vodozahvata – ekološko privatljiv protok. Na uzvodnom, djelomično uređenom profilu, postavljena je vodomijerna letva za osmatranje nivoa vode;
- Dostavljen je elaborat: „Određivanje ekološki prihvatljivog proticaja vodotoka Joševica na profilu vodozahvata za kompaniju Tuzla Kvarc“, urađen od strane Instituta za hidrotehniku d.d. Sarajevo, decembar 2020. godine, koji je usvojen od strane ove Agencije, u skladu sa Pravilnikom o načinu određivanja ekološki prihvatljivog protoka („Službene novine FBiH, broj 4/13, 56/16 i 67/19);

Nakon provedenog postupka evaluacije, u odgovoru Agencije broj: 10-538-4/21 od 01.07.2021. godine, konstatovano je evaluacija dokumentacije „Elaborat o određivanju ekološki prihvatljivog proticaja vodotoka Joševica na profilu vodozahvata“ i „Program monitoringa ekološki prihvatljivog protoka vodotoka Joševica na kome se nalazi vodozahvat tehnoloških voda za kompaniju Tuzla kvarc“ pozitivno okončana.

Elaboratom o određivanju ekološki prihvatljivog proticaja vodotoka Joševica na profilu vodozahvata definirane su slijedeće vrijednosti proticaja:

- $EPP(Q_{EPP}) = 0,024 \text{ m}^3/\text{s}$ za sušni period godine i
- $EPP(Q_{EPP}) = 0,036 \text{ m}^3/\text{s}$ za vlažni period godine.

Programom monitoringa ekološki prihvatljivog protoka vodotoka Joševica na kome se nalazi vodozahvat propisan je način obavljanja monitoringa nizvodno od vodozahvata kao i monitoring režima ulaznih voda u vodozahvat. Navedeno podrazumijeva da se prethodno urede mjerni profili, opreme vodomjernim letvama te ugrade urerđaji za kontinuirano mjerenje proticaja, automatskom opremom sa mogućnošću memorisanja podataka.

Na osnovu provedenog postupka konstatuje se da je podnosilac zahtjeva, „Tuzla-Kvarc“ d.o.o. Tuzla, ispunio minimum uslova za izdavanje vodne dozvole dozvole za zahvat vode iz vodotoka Joševica za potrebe rada pogona za mokru separaciju kvarcnog pijeska izgrađenog u naselju Bukinje, općina Tuzla, te je riješeno kao u dispozitivu ovog rješenja.

Podnosilac zahtjeva je, na ime izdavanja ovog vodnog akta, izvršio uplatu federalne takse iz tar. br. 43. Zakona o federalnim upravnim taksama i Tarife federalnih upravnih taksi («Službene novine Federacije BiH», br. 6/98, 8/00, 45/10 i 43/13).

POUKA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.


Voditelj postupka

Nihad Pezo, dipl.inž.građ.

Prilog:

- „Glavni projekat izvedenog stanja objekta za zahvat vode iz rijeke Joševice“ urađen od strane JP Spreča d.d. Tuzla, decembar 2009. godine;
- „Određivanje ekološki prihvatljivog proticaja vodotoka Joševica na profilu vodozahvata za kompaniju «Tuzla kvarc»“, Institut za hidrotehniku d.d. Sarajevo, decembar 2020. godine;
- „Program monitoringa ekološki prihvatljivog protoka vodotoka Joševica na kome se nalazi vodozahvat tehnoloških voda za kompaniju Tuzla kvarc“ urađen od strane Instituta za hidrotehniku d.d. Sarajevo, april/maj 2021. godine.

**Po ovlaštenju
Rukovodilac sektora za izdavanje
vodnih akata**


Haris Ališehović, dipl.inž.građ.

Dostavljeno:

- „Tuzla-Kvarc“ d.o.o. Tuzla, ul. 21 Decembra bb, 75000 Tuzla (Prilog)
- AVP, ISV – Vodna knjiga
- Sektor 50
- Sektor 40, arhiva
- oglasna ploča – AVP Sava